

auch anders getrenckts / Der eine ort besser  
als der ander / Vnd ist hie zu mercken / Das  
gute / tieffe Keller dazu gehören / Dazu die  
luft nicht wol kommen kan / Den sonder-  
lich / Die auff vnd anstossende warme luft /  
Dem Biere grossen schaden thut / vñ macht  
mit der zeit essig daraus / Den solche heis-  
se vñ warme luft / resoluir vnd löset auß  
des Biers natürliche hitze / Dadurch alle  
dinge regirt vnd erhalten werden / Wann  
nu dieselbige natürliche hitze resoluir vnd  
hinweg ist / so wird das getrenck alge-  
mach sawr / vnd zu letzt gar zu essig.

Es hilfft auch viel zu der sachen / gut  
Bier zu erhalten / Das man mit fleiß ach-  
tung darauff habe / Das die fasser rein ge-  
halten / vnd gefüllet werden / wie sichs ge-  
bürt / Das doch mehr in die haushaltung /  
Dann in die Philosophiei gehörig ist.

### Von bösen Bierem.

**D**avor ist zum theil von bösen Bier-  
em hin vnd wider gesaget / aber doch  
so wollen wir hie dieses orts / ein we-  
nig weiter dauon setzen / Vnd rühret  
der erste gebrechen des Biers her / von der  
materie / denn aus vnd von böser materie /  
kan nimmermehr / durch einige kunst / gut  
Bier zu wege gebracht / oder gebrewet  
werden